



# Carta husi

## XVI Assembleia Geral Ordinária

### Sínodo Bispo sira nian

### ba Povo Maromak nian

Maun-alin no bin-feton doben sira hotu,

Serviço sira iha sessão ba dahuluk husi XVI Assembleia Geral Ordinária Sínodo Bispo sira nian to'o dadaun ona nia rohan, ami hakarak hamutuk ho imi hotu, hasa'e agradece ba Maromak ba experiênciá kmanek no rico tebes nebé ami liu ona. Hamutuk ho imi hotu ami simu benção wa'in husi Maromak iha experiênciá sorumutuk Sínodo nian ida ne'e. Ami hetan duni força liu husi imi nia oração sira, ami lori imi hotu nia expetativa sira, imi nia lia husu oi-oin no mos imi nia tauk (receio) sira.

Liu ona tinan rua desde Papa Francisco halo pedido atu ita hahú processo ida nebé naruk hodi rona no halo discernimento, nakloke ba povo Maromak nian, hodi la taka dalan ba ema ida, atu bele "la'o hamutuk", ho Espírito Santo nia guia, sai discípulo missionário no lao tuir Jesus Cristo.

Sessão sorumutuk nebé halibur ami iha Roma hahú husi loron 30 fulan Setembrbo sai duni nu'udar passo importante ida iha processo ida ne'e. iha aspeto oi-oin, ida ne'e nu'udar experiênciá ida nebé molok seidak acontece. Ba dala uluk, convite ida husi Papa Francisco, ema mane no feto sira simu convite, liu husi batismo nebé nia simu, atu tur hamutuk iha mesa ida hanesan atu participa laos de'it iha debate sira maibé mos iha votação sira iha Assembleia Sínodo Bispo sira nian ida ne'e.

Hamutuk, iha complementaridade husi ida-idak nia vocação sira, carisma sira e ministério sira, ita rona ho klean Maromak Futar Liafuan no experiênciá ema seluk nian. Hodi utiliza método diálogo iha Espírito, iha espírito haraik aan nian ita partilha rikusoin no fraqueza sira husi ita nia comunidade sira iha continente hot-hotu, hodi buka atu discerne buat nebé Espírito Santo hakarak dehan ba Igreja ohin loron. Ho nune'e, ita koko mos importância atu promove intercâmbio ba malu entre tradição latina no tradição sira husi ema cristão Oriente sira. Participação husi maun-alin delegado husi Igreja sira seluk no husi comunidade Igreja sira hariku teb-tebes debate sira nebé halo ona.

Ita nia assembleia ida ne'e acontece iha contexto husi mundo ida nebé iha crise nia laran, iha kanek no hahalok desigulade nebé escandalosa tanis ho lian maka'as iha ita nia fuan no hatudu iha ita nia serviço sira todan ida nebé peculiar, li-liu ba sira nebé mai husi rai sira nebé funu hela daudaun.

Ita reza ba vítima sira husi violência nebé hamate ema, hodi labele haluha katak sira hotu tan mukit no corrupção halo sira foti dalan perigosa nian hodi halo migração ba rai seluk. Ita compromete ho ita nia aan atu sai solidário no serviço maka'as iha feto sira no mane sira nebé serviço maka'as atu iha fatin hotu iha mundo bele sai bada'en sira justiça no dame nian.

Santo Padre nia convite, mai ita fo espaço importante ida ba silêncio atu bele favorece entre ita rona malu ho respeito no hakarak atu bele hamutuk ho Espírito. Durante vigília ecumênica ba abertura sínodo nian, ita hotu koko hamro'ok ba unidade buras liu husi contemplação iha nonok nia laran husi Cristo nebé hedi iha Cruz.

"Cruz mak, tuir lolos, cátedra única husi Ida nebé fo mia moris ba salva mundo, hodi fo fiar ba nia discípulo sira ba Aman, atu hot-hotu bele sai ida de'it" (Jo 17,21)". Hamutuk ho esperança nebé metin katak ho Jesus Cristo nia ressurreição nebé fo mai ita, confiança mai ita ba ita nia Casa Comum, iha nebé rai no ema ki'ak sira nia hakilar lian maka'as ho urgência hodi dehan: "*Laudate Deum!*", Papa Francisco fo hanoin iha início serviço sinodal nian.

Loron ba loron, ita rona lia bolu kona ba conversão pastoral no missionária. Ho nune'e, Igreja nia vocação mak atu anuncia Evangelho nebé la ba de'it nia aan rasik, maibé mos hatu'ur iha serviço tan domin rohan la'ek husi Maromak ba iha mundo (cf. Jo 3,16).

Wainhira ita husu ba sira, saída mak mi hein husi Igreja husi Sínodo ida ne'e, ema balun nebé horik fatin laiha no hela de'it iha Praça São Pedro hatán: "Domin!". Domin ida ne'e tem que hela ba nafatin nu'udar ahi ida nebé sunu lakan Igreja nia fuan, domin trinitário no eucarístia nian, nu'udar Papa fo hanoin hodi bolu sai mensagem Santa Teresa do Menino Jesus iha loron 15 fulan outubro, durante assembleia nia laran. Ida ne'e mak confiança nebé fo ânimo no liberdade interior ida nebé ita experimenta, ita lalika tauk atu dehan sai ho livre no haraik aan ho ita nia diferença sira, ita nia hakarak no lia husu sira, ho liberdade no haraik aan duni.

No oras ne'e ami hakarak atu fulan sira entre sessão dahuluk no sessão daruak nian, iha Outubro 2024 nian, fo possibilidade atu hot-hotu bele participa concretamente iha dinamismo comunhão missionária nian nebe hatudu ona iha liafuan "sínodo". Ida ne'e laos atu sai ideologia ida, maibé experiência ida nebé hatu'ur abut metin iha Tradição Apóstolo sira nian.

Nu'udar Papa nia liafuan nebé ko'alia iha início processo sinodal nebé dehan: "Comunhão no missão sei halai ba risco wainhira hela de'it nu'udar liafaun abstrato ida se ita la kuda iha práxis Igreja nian nebé hatudu sinodalidade nia aan loloos no concreto (...), promove envolvimento real husi ema hotu no ema ida-idak" (9 de outubro de 2021). Desafio sira barak tebes, questão sira mos barak: relatório síntese nian husi sessão dahuluk ida ne'e sei esclarece kona ba ponto sira nebé concorda hamutuk ona, ko'alia mos kona ba questão sira nebé sei nakloke hela no sei forma mos lalaok oinsá atu lao ba oin iha serviço sira.

Atu la'o ba oin iha discernimento, Igreja precisa duni atu rona ema hotu, hahú kedas husi rona ema ki'ak sira.

Ida ne'e exige husi Igreja nia parte atu halo dalan ida conversão nain, nebé sai mos nudar dalan hahí nian: "Ha'u hahi Ita, Aman, Na'i Lalehan no rai nian, tamba Ita subar buat hirak ne'e ba ema matenek no neon nain sira no hatudu ba ema ki'ik sira" (Lc 10,21)! Ida nee kona ba rona sira nebé lakon direito atu ko'alia iha sociedade ka sira nebé sente excluído, iha Igreja laran rasik. Rona ema sira nebé sai vítima husi racismo, iha forma oi-oin, especialmente, iha região sira nebé povo rai nain sira nebé sira nia cultura ema viola no despreza. Liu-liu, Igreja iha ita nia tempo iha dever atu rona, iha espírito conversão nian, sira hotu nebé sai ona vítima husi abuso sira nebé comete husi membro sin lolon Igreja nian no serviço maka'as liu tan estruturalmente atu ida ne'e labele acontece tan iha futuro.

Igreja precisa rona sarani sira, ema feto no mane sira, hot-hotu hetan bolu ida atu moris iha santidade liu husi nia vocação nebé simu iha batismo, iha catequista sira nia sasin moris, nebé iha situação oi-oin sira mak sai nu'udar haklaken dahuluk sira Evangelho nian; iha simplicidade no ksolok ki'ik oan sira nian, iha foinsa'e sira nia entusiasmo, sira nia lian nebé husu no bolu oi-oin, iha ema katuas no ferik sira nia mehi, matenek no memória.

Igreja precisa fo fatin atu rona família sira, sira nia preocupação kona ba educação, sasin moris sarani nian nebé sira oferece ba mundo ohin loron. Precisa atu simu lian sira nebé hakarak atu hola parte iha ministério leigo sira nian ka iha órgão participativo sira discernimento nian no iha foti decisão sira.

Atu sai di'ak liu tan iha Igreja nia discernimento, Igreja iha necessidade ida rasik atu simu no rona liafuan no experiência sira husi ministro ordenado sira: Na'ilulik sira, colaborador dahuluk Bispo sira nian, nebé liu husi sira nia ministério sacramento nian indispensável duni ba moris isin lolon nian (Igreja); Diácono sira, nebé Liu husi sira nia serviço diaconado convida Igreja hotu atu serbi ema nebé kbi'it laek sira.

Tenke husik ita nia an atu rona lian profética moris consagra an nian, no tau atenção nafatin hodi rona Espírito nia lian. Igreja precisa fo atenção ba sira hotu nebé iha fiar la hanesan ho ita nian, sira buka lialoos iha Espírito, ida nebé "ba hot-hotu nia fo biban atu sai ida de'it iha mistério pascoa nian iha dalan ida nebé Maromak de'it mak hatene" (*Gaudium et spes* 22, 5), no oras nee iha no serviço dadaun.

"Mundo ida nebé ita moris dadaun, nebé bolu ita hotu atu hadomi no atu servi iha lia la tuir malu sira, husu ba Igreja tau hamutuk energia sira iha âmbito hotu moras missão niN. Precisa duni dalan sinodalidade nian nebé Maromak hein husi Igreja terceiro milênio nian" (Papa Francisco, 17 outubro 2015).

Ita labele tauk atu hatán ba lia bolu ida ne'e. Virgem Maria, ida nebé la'o uluk ona iha ita nia oin, nia mak sei acompanha ita iha ita nia peregrinação. Iha ksolok no iha dificuldade sira, Nain Feto hatudu mai ita nia Oan Jesus nebé bolu ita atu tau laran metin ba Nia Oan Jesus Cristo. Iha Jesus de'it mak ita nia hotu tau ita nia esperança!

*Cidade Vaticano, 25 outubro 2023*